



ДОМ НАРОДА

DOM NARODA

ПРЕДСТАВНИЧКИ ДОМ

PREDSTAVNIČKI DOM
ZASTUPNIČKI DOM

Комисија за избор и праћење рада
Агенције за превенцију корупције и
координацију борбе против корупције

Komisija za izbor i praćenje rada
Agencije za prevenciju korupcije i
koordinaciju borbe protiv korupcije

Povjerenstvo za izbor i praćenje rada
Agencije za prevenciju korupcije i
koordinaciju borbe protiv korupcije

Број: 05/8-50-14-175-15/14

Сарајево, 9. 5. 2014.

ZAPISNIK

15. sjednice Komisije za izbor i praćenje rada Agencije za prevenciju korupcije i koordinaciju borbe protiv korupcije, održane 10. 4. 2014., od 10 do 11 sati

Sjednicu Komisije za izbor i praćenje rada Agencije za prevenciju korupcije i koordinaciju borbe protiv korupcije sazvala je predsjedavajuća Komisije Dušanka Majkić.

Sjednici su prisustvovali sljedeći članovi Komisije: Dušanka Majkić, Mirsad Abazović, Beriz Belkić, Staša Košarac, Niko Lozančić, Milenko Obad i Milorad Vulić.

Opravdano su odsustvovali Sulejman Tihić i Borjana Krišto.

Sjednici su prisustvovali i gosti - predstavnici međunarodnih organizacija u BiH, predstavnici medija, te službenik Sekretarijata Parlamentarne skupštine BiH:

- Sead Lisak, direktor, te Dragan Slipac i Sreto Pekić, zamjenici direktora Agencije za prevenciju korupcije i koordinaciju borbe protiv korupcije,
- Damir Hadžić, Razvojni program UN-a u BiH - UNDP,
- Šejla Bektašević i Džihana Misirlić, Misija OSCE-a u BiH,
- Muamer Selimbegović, „FENA“,
- Ognjen Begović, „SRNA“,
- Semira Degirmendžić, „Dnevni avaz“,
- Nihada Hasić, „Nezavisne Novine“ i
- Jovica Katić, sekretar Komisije za izbor i praćenje rada Agencije za prevenciju korupcije i koordinaciju borbe protiv korupcije.

Predsjedavajuća je na početku upoznala članove Komisije s prijedlogom dnevnog reda koji su dobili u pozivu za ovu sjednicu, te predložila dvije izmjene, kako slijedi:

- da se za narednu sjednicu odgodi rasprava o Izvještaju o radu Agencije za prevenciju korupcije i koordinaciju borbe protiv korupcije za 2013. godinu. Kao razlog za odgađanje rasprave o ovom izvještaju navela je to da je za 11, 00 sati zakazana sjednica Zajedničkog kolegija oba doma PSBiH, a po njenom završetku i sjednica Kolegija Doma naroda PSBiH, čime će Komisija praktično izgubiti kvorum za rad i odlučivanje. S obzirom da Izvještaj o radu Agencije predviđa sveobuhvatnu raspravu, koja će sigurno trajati više od sat vremena, predsjedavajuća je predložila da Komisija na svojoj narednoj sjednici, koja će biti održana u najskorije vrijeme, obavi raspravu o ovom izvještaju.
- Također, predsjedavajuća je predložila da Komisija u svoj dnevni red, prije tekućih pitanja, uvrsti razmatranje Informacije o planiranim aktivnostima u vezi sa izradom Strategije za borbu protiv korupcije za period 2015. - 2019., čiji je sačinilac Agencija za prevenciju korupcije i koordinaciju borbe protiv korupcije, a koja je naknadno dostavljena svim članovima Komisije.

Kako o prijedlogu dnevnog reda nije bilo rasprave, predsjedavajuća je dala na glasanje izmijenjeni dnevni red.

Članovi Komisije jednoglasno su, sa 7 glasova „za“, usvojili dnevni red s predloženim izmjenama i dopunama, čime je konstatirano da 15. sjednica Komisije za izbor i praćenje rada Agencije za prevenciju korupcije i koordinaciju borbe protiv korupcije ima sljedeći

DNEVNI RED

- 1. Usvajanje Zapisnika 14. sjednice Komisije,**
- 2. Razmatranje Informacije o postupanju Agencije za prevenciju korupcije i koordinaciju borbe protiv korupcije u vezi sa Zakonom o izmjenama i dopunama Zakona o sukobu interesa u institucijama vlasti Bosne i Hercegovine (sačinilac: Agencija za prevenciju korupcije i koordinaciju borbe protiv korupcije),**
- 3. Razmatranje Informacije o planiranim aktivnostima u vezi sa izradom Strategije za borbu protiv korupcije za period 2015. - 2019. godina (sačinilac: Agencija za prevenciju korupcije i koordinaciju borbe protiv korupcije),**
- 4. Tekuća pitanja.**

Ad.1. Usvajanje Zapisnika 14. sjednice Komisije

Članovi Komisije su bez rasprave, jednoglasno, sa 7 glasova „za“, usvojili Zapisnik 14. sjednice.

Ad.2. Razmatranje Informacije o postupanju Agencije za prevenciju korupcije i koordinaciju borbe protiv korupcije u vezi sa Zakonom o izmjenama i dopunama Zakona o sukobu interesa u institucijama vlasti Bosne i Hercegovine (sačinilac: Agencija za prevenciju korupcije i koordinaciju borbe protiv korupcije)

Dušanka Majkić je u uvodnim napomenama o ovoj tački dnevnog reda navela da je Zakonom o izmjenama i dopunama Zakona o sukobu interesa u institucijama vlasti BiH, koji je stupio na snagu 19. 11. 2013., predviđeno da bude formirana Komisija za odlučivanje o sukobu interesa (u daljnjem tekstu: Komisija), kao i da Agencija preuzme zaposlene iz Centralne izborne komisije BiH (u daljnjem tekstu: CIKBiH), koji su do stupanja na snagu izmjena i dopuna Zakona obavljali poslove koji su sada u nadležnosti Komisije. Podsjetila je da je Agencija imala obavezu u roku od 60 dana od stupanja Zakona na snagu donijeti novi pravilnik i zaključiti sporazum o preuzimanju zaposlenih sa CIK-om, te navela da ta obaveza još uvijek nije ispoštovana. Zaključila je da je Agencija uputila zahtjev za autentično tumačenje člana 9. st. (6) i (7), te da je Ministarstvo pravde BiH, odgovarajući na ovaj zahtjev Agencije, konstatiralo da je norma jasna. Zatim je otvorila raspravu o ovoj informaciji.

U raspravi o predmetnoj informaciji u ime Komisije učestvovali su: Beriz Belkić, Niko Lozančić, Mirsad Abazović, Dušanka Majkić, Staša Košarac i Milorad Vulić.

Tokom rasprave članovi Komisije konstatirali su da je već postala praksa da se usvojeni zakoni pokazuju neprovodivim nakon njihovog usvajanja, te da u konkretnom slučaju ili postoji nejasnoća u primjeni Zakona, ili ga akteri koji su odgovorni za njegovo provođenje ne provode, a to su Agencija i CIK. Članovi Komisije upozorili su čelnike Agencije da su posljedice neprovođenja Zakona velike, te izrazili očekivanje da će rukovodstvo Agencije sa CIK-om u što skorije vrijeme riješiti sporne stvari u vezi s potpisivanjem zajedničkog sporazuma između ove dvije institucije, kako bi se Zakon u konačnici počeo primjenjivati. Komisija je, također, konstatirala da Vijeće ministara BiH treba okončati svoj posao po pitanju donošenja pravilnika o unutrašnjoj organizaciji Agencije, kojim će biti uređeni unutrašnja organizacija i način rada Ureda sekretara Komisije, utvrđena radna mjesta, opisi poslova, broj državnih službenika i zaposlenika, te stručni i drugi uslovi potrebni za raspoređivanje na radna mjesta.

Sead Lisak, direktor Agencije za prevenciju korupcije i koordinaciju borbe protiv korupcije, u odgovoru na konstatacije navedene u diskusiji, istakao je da je rukovodstvo Agencije prvobitno dogovorilo s rukovodstvom CIK-a da se kompletan Odsjek za sukob interesa prebaci u Agenciju, ali da je rukovodstvo CIK-a na narednom sastanku predložio Agenciji da se zajedno s ljudima iz Odsjeka za sukob interesa u Agenciju prebaci i šef Sektora za pravne poslove i primjenu Zakona o sukobu interesa. Lisak je naveo da je ovakav zahtjev CIK-a za Agenciju bio neprihvatljiv, s obzirom da je cjelokupan Odsjek za sukob interesa prema planiranom Pravilniku o unutrašnjoj organizaciji Agencije trebalo da bude smješten u njen Sektor za prevenciju korupcije. Naglasio je da je, osim potpisivanja navedenog sporazuma između CIK-a i Agencije, najbitniji zadatak sada na Vijeću ministara BiH, koje treba da

verificira Pravilnik o unutrašnjoj organizaciji Agencije, čime bi se osigurali mehanizmi za nesmetanu primopredaju osoblja između ove dvije institucije.

Nakon sveobuhvatne rasprave, Komisija je, sa šest glasova „za“, jednim „suzdržanim“ glasom i bez glasova „protiv“, usvojila sljedeći

ZAKLJUČAK

“Pozivaju se Agencija i Centralna izborna komisija BiH da, kao Zakonom utvrđeni subjekti, što prije primijene odredbe člana 9. st. (6) i (7) Zakona o izmjenama i dopunama Zakona o sukobu interesa BiH („Službeni glasnik BiH“, broj 87/13, od 11. 11. 2013.), te da u skladu s odredbama ovog zakona izvrše međusobnu primopredaju poslova i osoblja, a koju su ove dvije institucije bile dužne izvršiti u roku od 60 dana od stupanja na snagu Zakona.

Komisija podsjeća navedene institucije da neizvršavanje zakonskih odredbi predstavlja krivično djelo i poziva ih da poslove iz svoje nadležnosti u vezi s ovim zaključkom izvrše u najkraćem mogućem roku, kako bi se što hitnije ispoštovala odredbe Zakona o izmjenama i dopunama Zakona o sukobu interesa BiH.“

Ad.3. Razmatranje Informacije o planiranim aktivnostima u vezi sa izradom Strategije za borbu protiv korupcije za period 2015. - 2019. godina (sačinilac: Agencija za prevenciju korupcije i koordinaciju borbe protiv korupcije)

Dušanka Majkić, predsjedavajuća Komisije, u okviru uvodnih napomena podsjetila je da ja Agencija dostavila Komisiji 8. 4. 2014. Informaciju o planiranim aktivnostima o izradi Strategije za borbu protiv korupcije za period 2015. - 2019. godina.

Dragan Slipac, zamjenik direktora za prevenciju korupcije i koordinaciju borbe protiv korupcije, istakao je da u Informaciji Agencija upoznaje Komisiju s rokovima koji proističu iz postojeće Strategije i Akcionog plana, uz navod da će Agencija biti nosilac aktivnosti na izradi nove strategije za borbu protiv korupcije i akcionog plana, za period 2015. - 2019. godina. S tim u vezi, Agencija planira formirati interresornu radnu grupu, koju bi činili predstavnici 24 institucije i organizacije, a koja bi kroz najmanje sedam okruglih stolova i konferencija definirali pojedine aktivnosti i ciljeve nove strategije i akcionog plana. S tim u vezi, naveo je da Agencija predlaže da i Komisija nominira jednog svog člana koji će učestvovati u radu ove radne grupe.

Kako nije vođena daljnja rasprava o ovoj informaciji, Komisija je donijela odluku da za člana interresorne radne grupe za izradu navedene strategije imenuje člana Komisije iz akademske zajednice, profesora Mirsada Abazovića.

Ad.4. Tekuća pitanja

O ovoj tački dnevnog reda nije bilo rasprave.

Sjednica je završena u 11 sati.

Sekretar Komisije
Jovica Katić

Predsjedavajuća Komisije
Dušanka Majkić

Dostavljeno:

- naslovu
- a/a